

Ni'jberkoop, 17 december 2004.

Dag Rienk,

Oonze vassie van Lucas hewwe eregisteraovend uutrikt an de Kastman in et Kesteel van Gregorius in Blesdieke. 'Toevallig' was d'r ok iene van Boom-passe uut Meppel mit o.e. de kraante 'Stellingwerf' (weekblad veur Stellingwarf-Westende) in de buurt. Ankem weke deensdag/woensdag zal et d'r wel in staon. Veerder willen we hier mar gien drokte over maeken.

Om disse boekies ieder keer te maeken kost een peer centen dat we bin ok es even naor de Gemienten Oost- en Westende west te vraogen om wat subsidie. Dat bliekt nog niet zo ienvooldig te wodden omreden de Gemiente advies vraogt an de Schrieversronte. Die (Pieter Jonker en Johan Veenstra) hebben al een peer keer weten laoten dat ze d'r eins niks van hebben moeten, en al hielendal niet op mien maniere. Et preciese waarom-niet is mi'j nog niet dudelik mar dat kan gaon van de ge-aordhied van disse beide blispoters tot an mien foute aachternaeme (dezelde as Oene). Misschien het et wel zin as ie es een goed gesprek mit Pieter Jonker hebben zollen.

De belangstelling veur oons wark vaalt mi'j an now toe nog niet mit. Van bi'jglieks karkevolk hier uut de buurt hewwe nog hielendal nooit niks heurd. A'k dat bi'j kollega's in Grunningen, Drenthe, Twente en de Aachterhoeke heur dan leeft et daor blikber toch aorig meer. Ik bin bange dawwe now eerst dan ok mar niet meer van disse boekies maeken (laoten).

Now, weer hielendal op 'e hoogte.

Groeten,  
Piet Bult

P.S.

Kotleden (29/11) he'k jow en Jan Koops es een aemel stuurd.

Moj Rienk,

Veurige weke hewwe (Frank en ikke) een goed gesprek had mit Jaap van Dorp (oold-testamentikus) van et NBG en Klaas van der Kamp (uutgever) van NBG / Jongbloed.

Vandaege kreeg ik een berichien mit wat bescheid op een peer vraogen van oons. Dit riegeltien ston ok in zien briefien:

> We hanteren daarbij enkele criteria, waaronder de aanwezigheid van een commissie die het project begeleidt en de aanwezigheid van kennis van de grondtalen binnen de commissie.

En dus zuken we now een peer meensken die d'r verstaand van hebben. Zoj' ok een betien mitdoen willen in zoe'n soorte van kemmissie om oons wat in de gaten te holen? Jan Koops za'k ok wel even vraogen. Mien breur Anne zol wat graeg een stoel bezetten in de kemmissie he'k begrepen en Jannie Liemburg wil wel een betien as een soort van siktaoresse tussen zoe'n klup en oons instaoon om oons een betien of te scharmien van al te vule 'gedroom'. Laot oons et gewone wark mar doen...

Buten dat et NBG et vraogt (niks mit neudig trouwes), is 't vanzels ok een goed ding dat d'r es iene (liefst meer) even naor kiekt. Wij blieven ondertussen enthousiast doende. Ankem weke komt Lucas in proefdruk beschikber. Al mit al hewwe now al een 13 / 14 biebelboeken roegweg klaar.

Weej' misschien nog een aander die in zoe'n begeleidingskemmissie mitdoen wil?

Ik heur et nog wel...

mvg  
Piet Bult